

INUIT ATAQATIGIIT

Inatsisartuni



22.marts 2024

UPA2024/58

Inatsisartut Suleriaasianni § 36 naapertorlugu apeqquteqaat aallaavigalugu oqallissiaq imaattoq matumuuna saqqummiuppara:

Timersornermik pingaartitsinerput, timersornermullu aningaasaliissuteqartarnerput naammaginarnersoq naammaginannginnersorluunniit pillugu apeqquteqaat aallaavigalugu oqallissiaq.

(Inatsisartunut ilaasortaq Peter Olsen, Inuit Ataqatigiit)

Uanga isumaga naapertorlugu pitsaaliunerup iluani sakkussatsialassuatta ilagilluinnagaattut uanga takusinnaasara taassaavoq timersorneq, timersornikkullu maligassiuisoqarnerup tungaatigut suli annertunerungaartumik pingaartitsinissaq nukittorsaanissarlu.

Assersuutissatsialassuupput Islandermiut; Islandimi inuusuttut 1980- 90-kkunni nunarsuarmi inuusuttuni imerajuannerpaanut ikiaroorajunnerpaanullu ilaalersimagaluarput. Naalakkersuinikkulli kultureqarnikkut, ilinniartitaanikkut timersornikkullu immikkut ittumik annertoorujussuarmik iliuuseqarnermikkut, immikkut ittumik annertuumik aningaasaliissuteqarnermikkut nukittorsaanermikkullu imerajuttuuneq ikiaroorajuttuunerlu annertuumik appartingaatsiarnikuusimavaat.

Allaat Islandimi inuusuttut ullumikkut aanngajaarniutit tungaatigut nunarsuarmi atuinikinnerpaanut ilaalersimallutik. Timersornerullu silarsuaani nunarsuarmi pikkorinnerpaat ilaannut ilanngussimapput, naak inuianguullutik ikitsuinnanngugaluarlutik.

Tassa timersornermik pingaartitsigamik taamaaliorsinnaapput. Tassa timersorneq pitsaaliuinikkut sakkussatsialassuartut takusinnaasimagamikku immikkut ittumik timersornermut aningaasaliissuteqarsinnaasimapput. Tassa pingaatitsineq oqaluinnarani aamma timitaliineq iliuuseqarnerlu.

Savalimmiuni aamma taamaaliortoqalereerpoq. Allaat kommunit ilaanni timersortarfinnik atuineq akeqanngilaq allaallumi meeqqamut ataatsimut timersummut ataatsimut ilaasortaanermut angajoqqaat ukiumut tapiiffigineqartarput; meeqqap timersornermut kajuminnerulerlunilu peqataanerulernissaa siunertaralugu. Naluneqanngitsutullu ullumikkut Savalimmiormiut europami timernersornerup silarsuaani tupallatsitsisaqattaarput angusarissaqattaarlutik.

Piffisanngorporlu aamma uagut eqqartussallutigu timersorneq sumut atorniarnerlutigu. Timersorneq sumut atorniarparput? Timersornerup iluani inuttut nunatullu qanoq angusaqarusuppugut? Qanoq siunertaqarpugut qanorlu anguniagaqarpugut?

Nalunngilara timersoqatigiiffit kattuffiata 2030-mi nunarsuarmi timitsinnik aalatitsinerpaanngornissaq siunertaraa anguniagaraalu. Siunertaq nammineq immini ajunngilluinnartoq pissusissamisoortoq aamma tamanna tapersornerparput.

Siunertaq anguniagarlu tamanna naammappa? Naamik. Uanga isumaqarpunga naammanngitsoq.

Uanga isumaqarpunga nunarsuatta sinnerani unammersuarnernut angisuunut peqataasarnerput annguttarnerpullu annikippallaarujuussuartoq. Pitsangorsarlugulu nukittorsartariaqarpaput. Pissutigalugu.....

Assersuutigiinnarsinnaavara siorna 2023 naalersoq arnat assammik arsaattartut nunarsuaq tamakkerlugu unammersuarnermut anngullutik peqataammata nuanneraluaqisoq.

Taamani nuanneqisoq tullusimaarnaqisorlu arnartatta nunarsuaq tamakkerlugu unammersuarnissamut anngummata. Neriussimagaluqaagullumi ataasiarlutiluunniit ajugalaarsinnaassasut. Tassa kisianni ajoraluarnermik unammersuanermi tassa ataasiaannarlataluunniit ajugaanngitsorpuq. Unammersuarnermi unammisagut tamaasa ajorsarfigaavut.

Martsip qulinganiit martsip 16-iata tungaanut Arctic Winter Games Alaskami Mat-Su-mi ingerlanneqarpoq. Siornatigut nalinginnaasumik inuuusuttuaqqat inersimasullumi katillugu 120-it missaat peqataasarput. Soorlu siorna 2023-mi 120-it missaat peqataasimasut.

Tassa kisianni paasisarput naapertorlugu ukioq manna peqataasut aatsaat taamak ikitsigisimapput. Allaalluunniimmik affaluunniit inorpai. Peqataasut inuuusuttuaqqat inersimasullu taamaallaat 48-it missaannaannissimapput.

Timersoqatigiiffit peqataasinnaajunnaarlutik nalunaarsimasut tunngavilersuutaasa pingarnerit ilaat tassaavoq; peqataanissaroq akisualaarpoq. Pingarnersiusariaqalernertik tunngavilersuutigalugu, aningaasat AWG-mut atugassaraluatik allamut atorusunneruaat Nunanigooq allani unamminerit allat akikinnerusut peqataaffigerusunnerullugit.

AWG-mut peqataasut aatsaat taamak ikitsignerat uggorarpaq ajuusaarnarpaq. Timersuutit arlallit peqataanngitsornerat uggorarpaq ajuusaarnarlunilu.

Assorujussuaq uggorarpaq ajuusaarnarlunilu pissutigalugu AWG-ip siunertaa anguniagaalugu inuuusuttortagut eqqarsaatigalugit iluatinnaraluaqimmat.

AWG-ip siunertaa anersaavalu pingarneq tassaammat; Inuit inuuusuttullu issittumiittut timersorneq aqqutigalugu imminnut naapeqatigiinnermikkut ilisareqatigiinnerulernissaat ikinngutigiilernissaat, misigisaqaqtigiiinnissaallu. Inuunerup sinnerani puiungisaannagassamik nuannersorpassuarnik misigisaqarneq, takusaqarneq ikinngutitaanerlu. “Ikaartarfinnik” ikuallaanani “ikaartartarfinnik” pilersitsinissaq – ikinngutigiinerulernikkut qaammaasaqarnerulernikkullu nunarsuup eqqissinarnerusup najoruminarnerusullu pilersinneqarnissaa.

Timersortartut nunanut allanut angalanermikkut, inunnillu allanik naapitaqarnermikkut misigisaqarnermikkullu inuttut imminnut tatiginerulernissaat; inuttut sapiinnerulerlutilu nukittunerulernissaat siunertaalluni.

Inuuusuttut AWG-mi peqataasarsimasut, AWG-mut peqataasarsimanertik ilaatigut pissutigalugu ullumikkut ingerlalluartunut ilaapput, nunatsinni inuiaqatigiinnilu timersornikkullu maligassiulluartunut, inisisimalluartunullu ilaallutik.

Nuannaarutigisarpaat qujamasuutigalugulu AWG-mut peqataasarnikuusimanertik. AWG-munngooq peqataasarnikuusimanngikkaluarunik immaqa ullummikkut taama angusarissaartigalutillu inuttut tamaanga killissimassanngikkaluarput.

Taamaattuminguna AWG-mut peqataasarneq pingaaruteqarluinnartuusoq; inuttut, timikkut tarnikkullu nukittorsataallunilu peqqinnartuunera pissutigalugu. AWG-mut peqataanermi pissartanngornissaq angusarissaarnissarlu pingarnerpaanngillat, peqataanissarli pingarnerpaalluni; Ikinngutitaarnerup, inuannillu allanik naapitsinikkut qaammaasaqarnerulerullu kingunerisarmagu attaveqaatinik pilersitsineq, eqqissineq, asanninnerlu; nunarsuullu sinneranut matut periarfissallu amerlanerusut ammaanneqarlutillu pilersinneqartarnerat aamma pingarnerpaanut ilaalluni.

Taamattumingunauggornartututajusaarnartutullutaasariaqartoq AWG-mut peqataasartut aatsaat taamaikitsigilermata allaat unamminernut allanut peqataanissaq pingarnerulersimalluni AWG-mut peqataanissaq pingaartinneqarunaarluni. Aningaasassaaleqineq pissutaalluni. Aap, soorunami paasinarpooq aningaasassaaleqineq aammalu pingarnersiuisariaqarneq pissutigalugu AWG-mut peqataasinnajunnaartariaqarnermiq nalunaartariaqarsimanerat paasinarpooq, taamatullumi aammaaaliangersimanerat ataaqqineqartariaqarmat eqqaamaneqassaaq. Taamaakkaluartoq...

Taamaattumik apererusunnarsilluni taavami AWG suniarparput? AWG sumut atorniarparput?? AWG pingaartipparput? AWG Peqataaffigisarniarparput? Imaluunniit naamik?

Timersuutinimi allani qanoq piniarpugut? Sumut killippugut? Killiffipput naammaginagarpa? Timersornerup silarsuaani siunertavut anguniakkavullu suppat? Suna angorusupparput?

Isikkamik arsaannermi aammalu assammik arsaannermi nunarsuarmi, timersuutinilu assigiinngitsuni nunarsuatta sinneranut sanilliulluta qanoq angusaqarusuppugut? Ullumikkut angusatsinniit suli annerusumik angusaqarusuppugut?

Timersornerup silarsuaani siunertsinnut anguniakkatsinnullu timersornermut tapersersuinerput aningaasalersuinerpullu naleqquppa aamma naammaginarpa?

Taamaattumik apeqquteqaat aallaavigalugu oqallisissiaq manna saqqummiuppara, uanga isumaqarama timersornermut tapersersuinerput pingartitsinerpullu ullumikkuminngarnit suli pitsaanerungaarlunilu qaffasinnerungaartariaqartoq; minnerunngitsumik aningaasalersuisarnerput eqqarsaatigalgu suli pitsaanerujussuuusariaqartoq.

Qanormita partit tamanna pillugu isumaqarpat? Partit isumaat tusassallugu qilanaaralugu peqqissaartumik ileqqorissaartumillu oqallitoqarnissaaanik kissaassillunga.

Qujanaq